



對山集卷之三

七言古詩

懷金可卿

憶昔與君別，倏忽今年不能見。顏色徒存秋夕篇，
展玩淚沾臆。相思隔萬川，男兒奮迅雖有時。歎息君
才誠絕竒，監儒僅能誦章句。騰踏青雲凌鉅賢，珍珠
安能通俗口。廣陵之散誰可傳，罕山金可卿三原馬
谿田。徒使高名貫星斗，科場不售惟我憐。昔也令人
羨三鳳，今我孤鶩情惘然。相如既有凌雲賦，詎待吹
噓方上天。

丈夫行贈谷濟元兄令巴蜀

丈夫處世人莫知良驥在櫪空悲嘶仲尼相魯且不稱求赤區區將若爲昔予弱冠遊鄉校文章每出惟君好遂與忘年二十春世人那得窺其妙今歲春官君又歸暫同毛義捧親闈領邑不辭蜀道險作吏肯令心事違科場自古滯豪傑子瞻何必青雲客會當簪筆侍明光令人再覩搏風翮

送孫鏗鏗狂生也薰不謁予因以箴諭

有客有客自河中春日訪予不武功乍出長卷四五軸凡所爲贈皆鉅公羨君行年三十二能使世人知

姓字金殿羞言傳奉時藍袍自惜風流事一旦京華汗漫遊頓令齷齪埋高致聞君家世傳英武騰積詩書勤學古勵志須令竭死生成名奚必慚囚虜君不見首陽山頭雪如銀人生那討百年身若將此義從容去寧愧當時采薇人

相思行

相思雖深相見難於君况是長年別高義驚聞貧賤初深情遂許金蘭結三黜誰知柳士師幽居未忝東方潔忽然感歎欲搵衣豈意逢君洛陽陌頗謂能諳野鶴心不堪猶有雲泥隔河澗浪懼外人猜東施豈

是傾城色含笑長歌策杖來三徑黃花半欲開沽酒
鳴絃謝人世爾曹碌碌何有哉

送馬天瑞還京

庚申長安一見君知君氣蓋千人軍正德八年定蜀
賊延綏健兒如虎奔此時

天子方西顧名公才將如雲叱君從制帥適經過老
眼拂拭知有人果然三月破綿漢遂令巴蜀無風塵
向也王師亦嘗奮山東河北根株盡豈係將軍紀律
踈由來戰士駭騰斬掃蕩寧夸廖賊收笑談直羨終
耶俊渭水秦山壯氣迴金臺恒嶽益崔嵬相逢意氣

還如昔愧爾經邦濟世才

元夜見晉歌者辛寶賈謚賈騰

教坊子弟幾人好絲竹獨欣寶騰謚十年不識五音
清一奏真令百工尼幽居頗乏杯酒勞靜中却喜見
爾曹衣衫落落薄不蓋膝自覺藝妙心神高膏盡夜深
月將落猶惜知音促絃作我心感之雙淚流爾曹豈
係無依托古來志士咸若茲寧不逢人老溝壑中之
所負安肯索

秋風詞

長安道上秋風起吹入青門草靡靡客子携琴燕趙

來一感秋風心欲死鳴鞭躍馬過我前那堪杯酒重
留連酒酣氣發百志奮談笑須臾空有年坐中歎爾
壯士心人事何勞問古今張蒼亦能論刑法君平徒
然卜六壬仲尼治國若不稱曾參事母猶難信時勢
摧人著處生英雄遇柳常遲鈍南山磊磊雲氣橫寒
泉湔湔終日鳴請君拂袖謝人世與爾常爲谷口耕

贈王顯之

壬申以來兵事煩甘州一帶如痺肘

皇上憂勤厲萬機群公感激殊奔走不刺禿厮入寇
初番漢生靈若摧朽西寧古來百事無關梁阻塞三

年久耕牧誰能出近郊輓運何曾見升斗碗粟甘心
賣少妻積屍頗欲如岡阜徒使將軍覓健兒骨骸
安能察身手西州豪傑王顯之受命觀風自分守查
覈須令極細微扶持豈肯辭傾仆彭公總制大軍來
每事常稱濟世才積粟偶爾數十萬軍門氣色從此
開二賊潛走陰山窟赤斤罕東如破竹耨耜遠能闢
草萊牛馬何須論山谷經畧真令北海空勘讞邪止
邊情服古來志士各有懷天下蒼生豈無福邇者宣
大抵延綏縱橫千里人煙淨天子宵衣發虎符元戎中
夜傳軍令徹塞徒聞哭泣聲當関誰殄殘胡命法度

雖存人事卑內倫疎虞外何兢此虜終能作漢愆諸
公慎勿重留連果能司馬安邊策好稱天官破虜年

寄劉朝宗氏

吾觀蒼梧之東有巨澤萬里一瞬難恒測又聞北穹
幽都古奧壤四方六合同趨向風氣况當明盛時自
然蘊蓄生高尚予亦西秦古狂客羨子尋常獨豪放
義氣今無能叔牙風流故數陶心亮乾坤賦物原不
私賢哲膺時各有之其驕雖屈迢遞心恢宏猶擅慷
慨辭錦衣漢代執金吾貴盛豪華昔所無君才落拓
近亦少將相勲名宜自圖感君深意勸君保欲見難

為路途杳短歌微吟雖不長寄君聊見當年好

邯鄲美人歌

蘭氏小姬名鳳笙邯鄲美人獨擅名等閑一見萬金
賤何況逍遙翡翠屏精神婉變性情適自恨生身楊
柳陌陌上羞看遊冶郎鏡中愁作當眉碧學得素筆
不肯彈却將針指湊齊紈鴛鴦刺就腸先斷掩却銀
牀獨自嘆

秋雨吟

十日一晴晴復陰斜風細雨何浸淫山根泥滑寸薪
苦水面苔生平地深神怒天摧或如此已看百穀半

將死饑寒盜賊着處生誅斬番憂亂兵起徵求無度
民自難諸公徒爾嘆微官豺狼當道捕不得三公列
卿何足觀忽憶成化甲辰歲公私充國網維繫
皇帝臨軒發禁錢細民尚作溝壑斃况復艱難至此
特
九重深嚴那得知臺諫利害策閭閻不見寧息
期斗粟尺布命所直吏促官輸轉相逼甘肅縱橫土
魯番商洛紛紜織染給中丞受詔不敢來此地生靈
一何極嗚呼斯民天所生州縣相看何太輕
祖宗宏業振千古

陛下神武復英明朝收取壞事者會見爾曹雙眼清

送劉伯序

結廬調人世倏忽將十年我心非土木安能忘時賢
君家豪爽世無有我意私君今已久豈意今朝携手
遊笑談若遣風雲走今君歸去赴岷城恨不同君萬
里行青門碧草意亦白紫綬黃冠非兩情我歌雖好
人難聽歌以贈君非漫興烹鷄炊黍事總佳翥鳳騫
鵬有誰並君不見英雄遇事若等閑世道升沉瞬息
間請君但醉葡萄酒丈夫勲業在朱顏

送吳慎之令銅梁

卷三
第
憶昔與子遊鄉學短褐影影俱總角千人過眼無一
堪私擬君才當穎脫以茲常聽萬里鳴豈意蕭條飯
場藿我昔應時官翰林世間名士空相博轉覺君才
近所無垂老科場意羞縮奮迅因求勺漏閑聲華燁
燁今非昨苟能行事何足猜丈夫要見青天闊
國家名公不可數俱向專城事民瘼君不見漢庭黃
霸與魯公至今名譽振天地何況當時爲列公

寄張士元

黃金臺上雲依依黃金臺下水瀰瀰臣今萬里去辛
苦安可辭但願

陛下壽萬歲使臣萬里無遺思

祖宗洪業際天地尺地皆土人咸臣

斬刈流徙惟

上所爲避方炎炎有肉不可食有酒不可卮况臣侍
從邇文墀心之彷徨豈在此惟願

陛下有長期

陛下神聖古帝少臣心不爲避方老

王仁瑞梅花詩

十月君來許西口手出新詩百餘首苦詠梅花不肯
休竒恠妖嬈體俱有君才侷儻眼底稀揮毫時遣蛟
龍走志士遭窮古所難羨爾豪華幾片斗近聞東訪

揚使君長安車馬動如雲杯酒相逢休極意世上萬人徒紛紛不如早跨寒驢去醉我東山翡翠裙

喜王郎再過

王郎再自府城來敝車羸馬心恢恢自言遊宴徧臺省四座群公皆服才咲談之下走夷甫罄歎未盡春風開此語雖狂苦不妄可惜王郎無所裁勸郎舉措休輕薄古人似郎良可哀行檢不臧閭里惡郡縣之官豈君妬以爾聰明倜儻懷何必忽忽若朝露少年唾手取科甲榜中之人誰比數運徂事已死即休世上勲名乃天杜軒車駟馬雖可依覆水烹魚理一當悟

豈若深居華岡子殫酒看花守玄素

從軍行

烽火西傳虜騎來天王按劍雪山摧將軍裂眦奮一戰旌旗蔽日雲氣迴朔風獵獵天山遠層冰齧石交河斷材官爭取可汗頭諸君肯放明王返功成不日詔承明賞賜先推飛騎營驍騰俱封二千戶錦衣朱纓義氣橫聲名絡繹傳鄉邑甲第崢嶸開上京回頭笑殺魯連子白髮龍鍾空一生

驄馬行

漢朝御史大權力丞相尚書果難及一朝直指持斧

來十道爭聞冤鬼泣高帝朝儀本叔孫孝武英明體
面尊窮兵黷武盜賊起酷吏得志黔首屯暴生本是
屠沽子衣繡乘驄萬人靡長吏揮斥不敢前父兄烜
赫門如蟻夜夜朝朝樂事饒燕歌代舞霍嫖姚勢至
時違收請室烏散雲飛百事消

秋雨嘆

去年秋雨苦淋瀝今年淋瀝更無敵自從初一漲潦
河至於初七聲逾激浸淫若遣太華崩巖豈但平
川汨百穀腐爛莎草長惟有芙蓉水中直
崩墻壞壁人夜號比鄰處處通波濤明燈執傘待天

曙片雲浮來聲益號富家或能飽鷄黍嗟嗟亦此貧
兒曹拽椽為薪麩為粥斗粟千錢肯相鬻

原上官道泥已深原下卑濕人怎禁四方極目盡明
水野菜可食何處尋綯塗匍匐寡筋力賓客逢迎甚
胸臆安得大禹鑿九州更使蒼生免昏匿

此雨初晴人亦狂為能洗却煩蒸涼那知狼藉遂如
此積陰鬱鬱行坐妨兒童階下戲舟楫風動櫓帆行
獵獵不知何日墜蓮房亂向波心逐蓮葉

寄滕子冲

戊辰與子別京國一別十年如頃刻野人心性百事

慵尺書未入楊雄宅丈夫豪氣九品輕六品微官有
何得吾子風流近代稀新詩首首追曹植鵬飛鳳翥
變化殊龍挂蛟騰果安極有懷欲語誰可知尋常思
汝心如塞山東李夢弼河間李宗易人來徃徃寄我
書兼有篇詩如絡繹民懷昨日信亦至獨怪爾錫非
曩昔直卿山西消息無粹夫河內聲尤赫數君才名
先後無義氣上與雲霄浮愧我齷齪只飲酒未能徃
拂身後圖前日客從潯西過歷誦諸君有程課此意
蕭條久不聞私心豈但同年賀廊廟山林各有懷好
景不常時易蹉願君努力思古人人人生當作萬年身

有才上可報

明主坐令四海承經綸許西山水亦非惡斷壁懸崖
何磊落終南太白走其下清渭汧漳面相錯秋來朝
夕雲氣橫喬木森森鳴鳥雀中情泮渙何所櫻舊日
粗豪心漸薄或向西河學釣魚或向東原訪隱居割
鷄飲如壑跣足蓬頭奚愧怍譬如野鷺山鷄被樊繫
一朝脫翅向空山玉桂金薨肯輕集達亦無所歡窮
亦無所苦我曹心事久不白禿穎安能為君數去年
二月初經紫閣恠石驚湍陋天姥其下一里秦草堂古
人題詠橫如堵此時思欲與君遊擊筑徜徉歌石鼓

或時策杖瀑布間或時坐遠臨高岵此意寥寥不復
同因君歎息淚如雨

李節婦歌

鄉縣士大夫欲旌李銳妻之節南里子用之引
紀叔姬卒鄴之事謂不在厥居因賦小詩辯焉
齊之圖紀也紀侯命弟紀季以鄴入齊求后於
五廟由紀侯去國之後又八年而紀侯死叔姬
以紀宗廟由鄴始返而居鄴以奉紀祀蓋有鄴
則姬得以死國與銳妻欲死家而不可得者其
事萬不同也而以此例之哉銳死父文圓挈家

就選遂盡賣其田宅當是時銳妻雖欲如叔姬
之居鄴得乎成化甲辰之厄閔中老弱相食父
子兄弟散於四方雖婦人無歸義當歸之宗國
父母既死兄弟蕩然無存幸伯兄喬祿在故銳
妻往祿雖借貸而居亦異諸他人之室也今以
叔姬之事例之不知節婦之事於叔姬何不同
也叔姬邦君之夫人有與君同死社稷之義節
婦庶民之妻居無定業朝貸夕改又上制於舅
姑跡雖不同而心事一也夫道以無垢是尊婦
以潔身為操聖人之立教求其如是而已人豈

不欲盡年夫室以明婦人之義哉然翁姑怒而去矣田宅盡矣欲死則弱息在抱圖存則兄弟具遠加以年歲饑饉死者相藉使叔姬於此亦將若之何哉婦人不出閨門竇氏二女死於巖下彼巖下豈其家也苟無污其身而已矣此庶人之妻安可與邦君夫人比也匡章之不孝非孟子之辯後世何明大抵予之所著憂君子之論不明于時而已

武功節婦李銳妻節操直與青天齊夫子舅姑苦欲嫁不從見逐何所棲阿舅宦去賣田畝妻孥俱作燕

墓走悲號隕絕夫塚邊血淚如波心欲剖遺息在抱求死難欲守夫家豈能守吞聲自賃宗人居夜紡績織苧糊口辛勤匍匐二十載息兒成長為人婦三十年餘舅死官姑來置屋比舊寬小叔家口自逼及豈容老嫗供姑食紀侯去國紀季在叔姬故與劓宗對先後不免舅姑嗔立錐無地腸空碎小叔近又賣新屋西入汧陽不復東身計蕭條兄弟踈安得不就寡女宿庶民自與邦君殊貧人賃儻何弗居南里身史苦執禮豈未盡諳胡氏書桓公元年紀已拔宗廟所繫情難恕三年遺季存餘劓吾君既死身安極所以

歸劓死宗廟謂劓如紀心所以秦人鮮義自古然父
子尚有耒鋤較尋常豈異不顧親區區牧豎婦爾何人

送王德光

近山西往扶風縣過予極口重誇羨通渭諸生王德
光才思清新不多見予也聞之笑未言傍人那識為
親眷此生自小殊老成果然弱冠即知名古來穎鏡
物不隔十六人中當橫行霜蹄欲踏層氷裂區區萬
里應超絕中式西還謁草堂氣象渾涵原自別尊翁
豪爽近數希與爾今為聯翼飛短歌送爾意安極還
看春風得意歸

聶孝婦歌

姑未老夫已亡事姑惟恐姑心傷妾幸不死得事姑
姑病經年惟妾扶但得姑好妾常侍那惜此身成骨
枯可憐阿母死時語願汝有歸還似汝不見賢郎喪
汝時三載居廬不出戶

雲將軍畫水歌

誰將此水挂堂壁春風微動波濤鳴光明閃爍對天
日浩蕩不息朝東傾西閩將軍妙齡客英武桓桓獨
心悅他日龍荒破虜時看爾風雲千載色

丹廬篇三首

客子有請予談黃白術者殊戾厥旨因賦三篇
示之

丹廬煌煌神德居勤以煉之道所須素女抱珠光陸
離青衣公子誠微匹洞房清瑩蕙帳弛鉗以玉鑰嚴
兩扉四坐溫溫春風遲兩七勿虧丹已基徐出深閨
正容儀金鑪烈烈炎火馳承父之緒胤靈兒慎保護
之候良期兒復純大燦有輝修飾冠蓋過里閭長孫
肖祖性柔懿滓穢滌蕩肌若脂蝨斯洗洗彌軒墀世
德逶迤安可涯黃赤白黑守境隅分限整齊誰敢離
九九既畢神化竒五金值之變本軀駮鸞駕鳳恣所

如千秋萬歲天與齊

其二

鉛晶既離神明希強以配對忘化機男女孳孕各有
宜氣血勝負精何施大樸既散元氣飛君欲用之事
反殊白爲金精黑水基玄含黃芽原始初白黑混沌
入鼓池七日不輟真裏居被褐懷誠絕竒采之合丹
靈有餘升降揖遜必舒徐慎毋鹵莽爲鬼嗤吞啗既
足審所趨毫髮乖謬道乃夷千百鍊之堅不移是爲
道樞任汝之准上爲之凡三孳鉛氣盡剝靈漸肥萬
殊一貫理詎渝準繩未造君勿爲爐火之事鉛汞急

聖山集 卷三
挈此玄理君何師

其三

火記六百盡微言子欲煉之須得傳二氣方媾宜自然慎勿暴迫令有愆祥風暖日古所賢詰責統錄察機權纖芥不正晦吝縣反復兩七定始先均齊諦視轉精妍溶以上池俾真純若孩在袍母已捐配以姪女授赤門再取再配慎勿寒再再鎔之無憚煩鉛晶銷絕体還乾點化澆漓唯汝便宗技從此稱庶蕃百千萬億如景旋前後法度各有玄子若違之功不延丹砂效此勿迷眩事既瑩潔效亦然大丹爐火體相

連則而象之令子仙

十九日即事

養雛自恨羽翼短翼長飛去豈思返老烏目斷東南枝白日青天一何遠尾秃唇焦徒自啼啼殺老烏雛詎知願雛養雛還勝雛慎勿齷齪如老烏

躍馬郎四首

躍馬郎去何處傍人不留姊留之汝父無言淚沾臆握轡揚鞭過市曹胡不懼爲朋友識汝既有室將有子何事嗷嗷日相逼生男要使老來好汝父逶迤今已老一旦飲恨辭世人舉眼相看誰更親吟詩寄汝

雙山集 卷三 哭汝痴有父不孝胡為兒躍馬郎去何急

其二

躍馬郎去何遠父不絕汝汝自絕遺我孤坐淚如滾
生兒日夜望長成汝既長成復凶狠雪夜安能料汝
來下堂迎汝亦堪免怒目直去不顧予假汝為父汝
何遣上堂恐為賓客羞迎以問汝怨不休手欲撻汝
心已反恐汝衝寒未曾飯躍馬郎去何遠

其三

躍馬郎去何速七十古稀予五一所剩十九亦已感
汝母不祿惟我存記汝賦詩猶在櫝匊匊經年為汝
婚頗謂有子復有孫上堂忿怒日相逼即汝為父何
以聞含垢隱忍為汝少女益兇氣是數積忿莫消甘
痛哭眼前所見止童僕躍馬郎去何速

其四

躍馬郎去何迫汝父陰憂誰可言汝固遺之在空宅
空宅徨徨不見人欲聞兒語那能得父有狗馬尚可
憐生兒如此胡不惜嗟嗟父齒日已長有言寄汝幸
勿忘汝父於汝有何惡婉容待汝汝反霍不見東門劉
遐齡日夜攀號父安作我詩四陳我心摘愁雲慘淡
天無色躍馬郎去何迫

破悶四首

生兒日夜望長成兒不若人父豈欲兒今怒我棄我
去中堂孤坐五心酷兒且去去母速

其二

兒既有室將有子胡不懼汝父氣噎不通一朝死一
朝死去豈不悔他人雖親豈如爾兒去兒去傷我心
畜鳥尚思懷好音兒兮兒兮諦此吟

其三

汝母不祿汝父存念汝孤身無弟昆千思萬慮心靡
碎憂汝恐生讒妬門汝既能賦洞大文動遭抵觸意

如焚今此不歸何以聞呼兒不應聲欲吞兒兮兒兮
思我恩

其四

嗟嗟爾父齒已長感歎獨坐魂飛揚有兒丁壯心忽
狂耳聾目瞽何所望徘徊寒手躡中堂形影自弔淚
沾裳朋友慰予陳素觴旨酒在口神愈傷此意真切
孰可方神祇有靈鑒我行爲我送兒還故鄉與之共
坐陳肺腸心意洞達疑忌忘安思履和循天常使兒
譽聞日復長千秋萬載守勿忘兒兮兒兮蓋自強

十六日聞張甥之桀訃

於戲人生百歲少適意為樂幾時凶變生頭禿齒豁
復丁此兒女之際胡為情生女欲嫁必好婿此婿此
才誰與京文章欲窺班馬戶盛代科場先得名共和
不實意安洽孝道因心人詎能三十二歲修殄滅我
口不語心獨驚遺汝大人百志歇辛苦生男安所成
孤兒嗷嗷雙女泣死者不聞生者悒親戚哀毀豈滅
性天高地厚嗟何及強嘗醯醬且隨人背食粗糲甘
若蜜膏梁之子忽如此痛苦在心情可已憶當西堂
群試時等閑所作俱高致含弘那許世情移見者都
誇公輔器此日重凋喚不回地下修文豈虛位我歌

欲轉音復哀鬼神有靈安在哉百年過眼若旦夕汝
志不伸人盡惜幽懷咄咄欲寐難城烏伊啞東方白

四月三日雨示德克

昨日有雨塵不洒今日雨多雲更長遙天四望無寸
碧野人稼穡何所妨頃聞江淮人相食父子不保况
路傍關中雖無橫盜苦邊餉轉輸日相望麥豆半為
風雨蝕我秋未布人皇皇晨興東出望雲氣青天赤
日心自傷千歎萬息日將昃天風不動簾影黑須臾
雨脚下平地塵喧何啻萬馬力向夕雖看懸溜微達
旦霏霏雨如織喜聞優渥遍九土倏忽之間信難測

天地之德本好生大塊豈厭物生成人身店逆百體
滯氣運所生誰可明豐年弗儉歉時極却與造化生
攬捨安得官長息雜役令此黔首俱深耕禁侈薄歛
又自足何必義倉與長平

有所思

有所思兮乃在天一方徘徊不可見反復令心傷秋
雨霏霏庭院空思逢君兮君莫逢流蘇羅帶那復展
堦下梧桐生悲風

西谿醉歌

西谿草堂春水深西谿主人谿上吟割鷄把酒勸客
醉少小幾時衰老侵朱顏白日休自負請君試看芳
春林我聞此語倍感激世上幾人如此心明朝何不
出美酒更與東眺華山岑

觀輿菜

汧東種菜菜已熟數畝輿來不盈積積陰地冷生意
微稀渺空教恠童僕連年種豆無一成苗稼雖強陰
雨蝕家口嗷嗷三十餘此菜安能佐饘粥徃歲寧無
恒雨時不似今年太翻覆三月浸淫到仲秋天日不
瞻魚走陸農家處處守場禾官吏紛紛飽梁肉深山
雪凍薪不來男號女啼聲似逐水不潤下洪範嘆願

以波濤注空谷雨暘時若年歲豐我菜全無心亦足

東山圖

張侯風致人所無走使示我東山圖展玩數四信絕
筆問君此物奚來乎懸崖恠石幾千仞鳴泉遠自天
河噴衝波飛沫沉日光松枓參徊與天近江東夫子
廟廊材何心苦愛此山遁海內搶攘晉祚衰強臣雜
虜聲相震志士猶懷異代悲英雄况覩當時運豪華
紛紛左右軍虛名實害動愁人不若恣意向巖壑閑
窺石壁靜怡神洞房露下空青滑松徑春深花鳥馴
此時坐嘯樂已極况有蛾眉翡翠裙蛾眉翡翠殊妖

冶急管繁絃曲難寫浮雲欲住芳草青萬態空嬌益
瀟洒前遮後擁迤邐陳可憐歲月如飄瓦襟期未與
世推移羅綺寧閑身用舍新亭手板壁後兵始信時
危須大雅張侯收此豈無意人情所愛皆身似博學
期登白虎堂成名却掌中年事撫卷因生感慨懷因
寫長歌爲君寄

聽韓景文彈琵琶

關西弟子彈琵琶武氏成名已三世勝死忠老傳授
稀尚宵已近六十二要妙誓不教女兒精微安肯輸
同事武功少年韓景文香撥檀槽酷能似然打鈎批

色色精調停布置俱神異大曲渾涵小曲媽群宮衆
調無窺避始知絕藝本天成誰云末技非難致清秋
八月賓客來尊俎未列管絃開立酌停歌兩三醞此
聲一出人盡駭倉庚微吟柔桑底凍竹乍裂淇園隈
遊蜂逐萼遠不歇曲山領回鑿繁更催千山夜落九天
雨空谷朝驚三月雷悠揚拂掉轉相勝開喝遞互清
且哀鉄騎橫來長樂坂神女坐對陽雲臺閑庭翻絮
去閃爍絕壑墮石來碣磈曲曲宛轉意態別三百四
十猶往回憶昔京華公宴日教坊子弟紛紛出三院
都輸張學彈數年頰會聲音悉以此常誇武氏高漢
今操縱如畫一夜深客醉席屢更四座嗟咨未忍行
曲終更奏不知旦戶外驚聞繁雀鳴

送陳禹學

往歲東岡寄我書肅州之變惟君保消謂

朝廷錄上勲那知中道成顛倒

聖旨通教御史收聞言轉覺胸襟好今日君來我問
之形神洒落雲霾掃我事既舉理已直功過惟天吾
敢造英雄素位往往同氣運如今亦堪惱西堂美酒
鬱金香請君消飲莫停觴浮名無益損心性所以莊
周稱古狂君家遠近太山麓綠水白雲惟所欲何不

棄置居此中坐嘯雲巖友麋鹿患難豈移烈士心衣
冠故惹英雄辱羨君奇崛因醉君此去曲直人共聞不
須極意與之白早計徜徉還鹿門

蜀山峨峨

蜀山峨峨漢水湔湔兒來既不易兒去誠已難嗚呼
皇天奪我老母使我倉皇奔逐不得前折心欲訴誰
可言我父舍我早長遊恨不終日侍母邊南山可摧
海可涸此身煢煢往安托

寄張子鵬

別時石家適多事苦以陰雨成少留令兄已值羅網
厄此際恐且成黜囚吉凶悔吝有天數後生粗豪亦
非誤羨爾平生閉戶人何者尚爲鄰里愁

戲介夫

張家酒惡吳酒良以使者兩索皆見妨好雨豈知主人
苦暖泉眼底成蕭湘躍馬欲行還自止不憶此行忽
如此歌舞雖佳酒不堪安用哢哢聒雙耳

示昭胤及桐方等

爲學不努力瞬息棄前功老夫衰境倦筋骨安能久
坐空庭中徘徊不見朗誦人迤邐豈羞長跪同昨日
街頭黃髮兒今已倏忽成老翁諄諄念汝理不達切

切寧爲虞困窮此心逐物返自易勉哉莫作長匆匆
傷軹軹可久之子族之子姓莫強焉讀書習
駸爲成人倏爾告亡涕泗交頤哭之以詩志
予傷也

吾宗有孫子玉質光嶙峋總好紙墨事敏捷如有神
溫克過諸父私爲予所珍緝學綠野忘寒暑奮志直
欲追先民大美不竟乃夭折使我痛哭聞者辛汝死
不復作我哀誰可陳少年弱冠隨鬼錄爺孃兄弟哭
聲直上千清旻埋玉於土幾時出荒郊日落惟孤墳
孤墳三尺生秋草秋綠東西南北人

瑞州太守行

瑞州太守鄺廷瑞瑞至之日賊乃驚手無寸鉄兵衛
空健兒聞驚皆迺避郡吏不敢更趨承苦諫當虞身
後事四境安危係此身太守一迺何以徇當衙一呼
士爭奮始信英雄氣有神賊兵星散城已保轉顧因
知寇所巧樊破毀柵歛近民賊失所資如逝鳥至今
瑞郡立生祠君與劉周如在茲丈夫尋常薄鍾鼎毀
譽升沉何足疑嗟嗟具錦者誰子謗君番使君名起
蓋棺事定古所傳才去幾時民若此天道恢恢監獨
明區區庶子胡爲爾

送席給事彖判夷陵

扶輿之內惟人最靈禮義所開品物乃成四維弗張
人滅天頃細氓弗忌君子是兢一綫不絕其幾豈輕
今夕何夕與子逢迎握手述志嘉言聃聽感君之意
慰我平生酌子以大斗兼之以雄鳴聞君遷謫萬里
去君懷磊落令吾驚湘灑之賦賈生弔屈平而傷情
忠臣之死志不滅况此芥蒂何所撓斯文眼底掃地
盡齷齪徃徃偷高名我肉可裂舌不可轉兮吾不如
妾婦輩非面是而求榮譬如已墜而復起已死而復
生精意直與上帝訐皇天寧不監爾之忠誠夷陵山
水亦改色嗟君直道昭汗青君不見長安道上紅塵
起千秋萬古未不歎誰見當時浮薄子

簡羨陂子

是人之惡我所惡夫子含弘猶與言砥礪雜玉理難
別咄咄是人非可原孔子猶誅少正卯四凶不殄虞
庭屯愧我不爲聖世用故令是人橫所論群公幸能
表正直百家何日聲繁寃閔中自古英豪窟忠良徃
徃傳餘馥岳神近來豈失守不產善類產尤物宇文
只是踈狂子躍馬鳴鞭走倡肆八月初收事已誣因
循到此將安止張譚蕃作捕叛人蓋屋良家何負爾

貲財蕩盡丁口空子女都爲橫盜餌皇穹應是照奸
諛丈夫何懼誅東市劉韓畏引苦吞聲相將欲作溝
瀆死天子龍飛十四年刑殺當罪賞當賢群公定不
爲爾誤天道古來惟好還君不見往時金吾附中貴
常將斧鉞償私憤徒想豪華到子孫安知目下成薤
粉是人貪暴事已然嗟嗟是人何太忍

席侍御過予言乃兄方伯公少時夢涪江漲落
得碑刻曰三仲聯芳未幾方伯公登第又二年
季第給事君與侍御君相繼亦第位既顯願名
復芳烈夢之足徵有兰石是者因群公之賦倚而

賦之

席侍御温以貞方伯之弟給事兄手出一卷皆鉅作
授我讀之嘆且驚傳巖之夢古所信掌夢况是周官
名精誠昭合理自異靈氣粹會寧肯輕高科顯宦世
雖有豈若君家昆與昌時次第傳令聲山可推方地
可裂此聲千古恒光明方伯長厚近未覩雄文絕藝
鳴西土給中初官骨鯁聞世間男子誰比數况君新
自翰林除風骨飄飄氣如虎片言已識冰蘖心終身
肯放鯨鯢侮蜀中累代擅賢豪不似君家兄弟曹袖
中長劍光如許幸掃埃捨翊

聖朝

青門歌

人生會少離別多握手送君君若何青門芳草四彌
彌蒼渭素湓生愁波今日送君歸何日望君至憐君
磊落人粉華亦何事長亭山色遠近開與君酌酒願
君醉此去當為遠別離離愁漠漠心如碎楊柳青青
知為誰鳴泉日日摧歸騎歌者且勿停行者且暫息
灞陵橋上西日馳朱顏那許人恒駐君才特達近所
稀許身當作青雲器况茲先後被恩私闕閱崎嶇蔑
群貴從來將相出名家涔魚輒鮒空相覬願君拂拭
星斗文莫使塵氛等閑蔽離別雖難兒女情行藏頗
涉英雄事酒酣長揖各自歸明日相思渺無際

世爵堂宴歌湖子

故人在眼幾人是今日見君心欲酸西堂設宴奉高
會佳期古來誠已難摩遊慷慨竟不歇老去風流還
自歎長生有訣未一試頓令白髮摧朱顏仲連豈是
魯男子孫登寧愧石門山卮酒奉君為君壽莞絃瑣
瑣何足言

惜昔行

憶昔同子雲霄上志意逍遙隨所向豈知今日老會

來臨風握手增悽愴邊城七月秋風寒大河蕩蕩无
殺端君今匹馬甘泉去撲眼胡沙行路難

王文泉

玉女泉西有石室水落龍潭波潏潏笑殺東京馬仲
長駐此何為忽飄逸平生絳帳縣絲竹數十蛾眉列
華屋泉頭習習秋風生不見當時環珮聲古來大美
小難妬愛爾千年文學名

將餞明叔值公垂至不果先寄明叔

欲餞羨人詣彭麓更值故人來許西藍輿已駕復自
咲咲已入門還索題晨來鳥雀噪不止豈憶佳期忽
如此呼兒洒掃開東堂漉酒雜酒雜徊意彌喜人生會合
誠獨難誰謂相逢倉卒間東公主人且微憇明日共
汝遊南山

華山篇

華山高兮幾千仞煙雲終日橫其巔中有仙人受靈
藥刀圭入口壽萬年天方先生紫霞吏下謫尚有雲
霄思榮名耻逐世人機高風獨獨耿昌明世歸隱忽經
三十春賢郎頭角更驚人文章已可報

明主林壑何辜自在身聞君欲訪蓬萊去萬里天風
豈難致歸時尚過華山頭與君却話希夷事

岐東宅聽歌

予醉鳳泉酒汝歌燕伎詞調罄行轉迫已知異過度綴
吟應自竒岐東主人喜賓客如我更出黃金卮更出
從何始千呼萬喚金陵子綺坐一都鋪羅襪香塵細
逐雕梁起仙姿豈用粉黛粧羅衣不受東風綺坐客
徒驚玉貌無當歌誰知希聲美岐東岐東君自知此
子此歌令我疑不知東山謝安石所携與此誰妍媸

疆場村

渭南西北疆場村無數桃花開四華門高陵到此已卓
午灃路風沙愁斷魂去縣尚右三十里僕夫嗷嗷默
相語地慘天愁行路難豈知士人心更苦五字先拚
數莖鬚千金不及步兵厨太似處士興恢闊高風常
候城西隅何時身坐少陵洞北八渠細倒水晶壺

題王秀才牡丹圖

何日到吾家牡丹應著花開園一見興已發遙似當
年宴紫霞雕欄不受春風柳似秋葉紅蕤舞風力終日
廻旋不肯休根株苦被丹青畫世遠路遭迴銷客心夢
魂惟在草堂陰牡丹牡丹吾語汝三月八日始霅雨

夜宴孝夫宅

憶昔正統天順間渭南薛丈同先子閔內通稱夫子

名山集 卷三
名二老實為天下士以此通家數十年善行嘉言時
在耳後嗣全如兄弟親前脩白篤謙恭禮往歲逢君
巴蜀歸厚意遙遙還若此愧我踈慵未敢當聞君談
論心私喜

盛世自宜英邁人迂儒豈識經綸理蕭瑟難居侍從
官賈生肯與絳灌比司馬逍遙忽見疑誰知中道生
萋菲治郡無能返異才看花尚切群公齒立壑徒深
社稷憂

廟堂獨忍乾坤否春暮閑遊少華峯逢迎幸辱賢橋
梓握手那知感慨生酣歌不與見稀聲起君臣之義若
莫忘遠期三月下和陽用舍自為大臣事顯晦豈為
吾道妨君不見崑崙黃河天上來銀濤雪浪如山摧
不遺涓滴盡入海誰謂海門開不開

南谿泉池歌

此池故無許今來心自疑泉源不為后土抑特與幽
居扶勝竒水北主人冰雪姿携我每來遊此池往時
坐弄已適意即日行吟尤所宜玄靈本自灝天坼佳
處獨令豪俊知君不見秦嶺以南水無數洶湧滴瀉
誰更強愚公之溪一掬耳此水此名非公誰

卜三值雨

初八開霽十三雨雲氣縱橫愁殺人去年一雨動兩
月四野茫茫咸巨津百穀罄死道路失行者坎陷居
者嗔頃雖得意樵採絕富室嗷嗷無寸薪此雨復作
勢須久市肆何能有升斗不見旅署敷德堂當衙兩
柱先摧朽

長安壽趙封君歌

客向華山去過宿長安坊明日復延佇大醉使君堂
使君之父松鶴翁銀髯雪髮來從容見我更取六斗
出一飲已頃三百鍾匆匆數語見胸次四座通看獨
神異此翁本是天上人世間圖畫空相似徂徠之松

千尺長終日紛紛雲氣翔南極老人跨鶴至其下可
許尋常當翁言明日是初度滿庭賓客如煙霧使君
自喜春日長天際誰知有仙發靈藥閃爍堆玉盤持
以贈翁翁自看一粒便可八千歲幾度咲觀滄海乾
我執翁手爲翁語世上如翁幾人許生兒不忝杜與
房舉手爭看橋共梓群仙今日上翁堂何以贈之雲
錦章綵衣先見二千石使翁姓字千載香

閻家渡呂王二君作

美人約我遊湯泉明日同之清渭川日中我抵閻家
渡不見美人心自憐嘉興太守清狂客肯使相逢倉

卒還天昏雲暗古道澁思君不來空佇立金銜白馬
中夜嘶青尊碧碗嗟何及達旦不寐芳意衰空庭露
下蒼苔濕明星漸低人漸喧起來翹首望西原原頭
不見車馬下戶外空聞鴉鵲繁

對山集卷之三終

程